

# Boring Dei blong Patrik

*Ol bigfala brata blong Patrik oltaem oli bisi blong spenem taem wetem hem.*



## I kam long Rebekah Jakeman (I kamaot long wan tru stori)

*Stori ia i hapen long USA.*

Patrik i stap lukluk i go antap long siling taem hem i stap lei daon long bed. Hem i boring. Hem i bin ridim ol animol buk blong hem, jiamjiam long trampolin, ronron long baeskel blong hem raon long rod blong haos blong hem. ?Wanem nao hem i save mekem naoid?

Patrik i stanap i wokbaot i go long rum blong bigfala brata blong hem Daniel. ?Bae yu save pleplei wetem mi? Patrik i askem.

“Sore mi no save. Mi mas stadi,” Daniel i talem. Hem i no iven lukluk nomo i kam, ae blong hem i stap nomo long buk we hem i stap ridim.

Patrik i harem nogud. Daniel *oltaem* i stap stadi. ?Hem i no save spel smol?

Okei. Daniel i bisi, be Patrik i save askem nara brata blong hem, Simion. “Mi les. ?Bae yu save pleplei wetem mi?” Patrik i askem.

“No, i no tedei. Bae mi go aot wetem ol fren.” Simion i putum jaket mo wokbaot i go aotsaed long doa long fored.

!Patrik i kros tumas! !Hat blong hem i pam moa kwik! Ol bigfala brata blong hem *oltaem* oli bisi blong pasem taem wetem hem. Hem i ron i go long bedrum blong hem mo i sarem doa strong.

*!I no stret olsem!* Patrik i talem.

Hem i stanap strong mo jiam i go long bed blong hem. Hem i filim se jes blong hem i hevi. !Hem i boring tumas! Be hem i kros tumas blong tingting long wanem bae hem i mekem.

Afta hem i tingabaot wan samting hem i lanem long skul. Tija blong hem i tijim olgeta se blong stap pulum gud ol win, i save helpem olgeta i filim kwaet.

Hem i talem, “I had blong fiksime wan samting taem yu kros.” Sapos tingting blong hem i stap daon, Patrik bae i save tingting long wan wei blong faenem wan ansa long boring problem ia.

Mekem se Patrik i pulum bigfala win. Afta hem pulum wan moa bakegen. Afta, sam moa bakegen, jes blong hem i nomo hevi. Be hem i no save wanem blong mekem yet.

Hem i sidaon mo i lukluk long pikja blong Jisas Kraes long wol blong hem. ?Wanem nao Hem i wantem Patrik blong mekem?

Patrik i go daon long ol ni blong hem. Hem i talem, “Papa long Heven, plis helpem Daniel taem hem i stap stadi. “Helpem Simion blong gat wan gud taem

wetem ol fren blong hem. Mo plis helpem mi blong mi no stap boring.”

Taem Patrik i finis blong prea, hem i gat wan aedia. Hem i ron i go long rum blong Daniel.

“Daniel, taem yu finis, ?yumitu save pleplei tugeta?”

Daniel i karemaot ae blong hem long buk mo lukluk klok long wol. “Mi save spel blong 30 minit. Afta yumi save go aotsaed. ?Yu wantem mekem hemia?”

“!Yes!” Patrik i smael mo i ron i gobak long rum blong hem. Hem i faenem wan animol buk abaot ol taega we hem i laekem blong lukluk long hem. Afta hem i stap ridim buk ia, hem i pleplei wetem ol blok. Sam taem i pas, mo hem mo Daniel i wokbaot i go long ol bus kolosap long haos blong olgeta.

“Yu wantem blong pleplei ol man blong faet long spes o ol man blong wokbaot long bus. Daniel i askem.

“Mi no wantem save. Mi glad nomo se yumi save spenem taem tugeta. Hemia i moa gud bitim we yu stap boring,” Patrik i talem.

Daniel i smael. “Okei, be pleplei wetem yu hem i moa gud bitim taem we mi stap stadi blong wan tes.

Patrik i harem se hem i glad tumas taem hem mo Daniel i wokbaot fo leg long gras. Mekem tingting blong hem i go daon i helpem hem i tingting moa klia mekem se hem i save faenem ansa long ol problem blong hem. Mo Papa long Heven i helpem hem blong kam moa olsem Jisas Kraes. Long en blong hem, hem i wan gudfala dei. ●

